

«Sfidas enormas malgrà la cuntinuitad»

Reacziuns a la reelecziun da Barack Obama

DA FLURIN ANDRY / ANR

■ La reelecziun da Barack Obama procura a l'avis da Barbara Janom Steiner e ses anteriurs collegas Stefan Engler e Martin Schmid per ina cuntinuitad a favur da populaziun ed economia americana.

La notg da mardi sin mesemna è vegnì reelegì il president dals Stadis Unids da l'America Barack Obama per ulteriurs quatter onns. «Jau avess era dà mia vusch ad Obama», di la presidenta da la regenza grischuna Barbara Janom Steiner. Ch'ella craja che per ils Stadis Unids saja stada la reelecziun d'Obama la meglra varianta. Da quel avis è er ils dus cussegliers dals chantuns per il Grischun Stefan Engler e Martin Schmid. «Uschia po Obama uss cuntinuar a realisar cun il medem team ils projects ch'el ha inizià, sco p. ex. l'Obama-Care, la refurma da sanadad cun assicuranza da malsans obligatoria», din tuts trais. Ch'i na vegnia però betg ad esser simpel, constatescha la presidenta da la regenza e Schmid agiunscha che las sfidas per il vegl ed a medem mument il nov president restian tuttina enormas.

«In pajais dividi en divers regards»

El menziuna ils debits immens dals Stadis Unids da l'America, «mintga di vegnan stampads novs dollars» e la gronda dischoccupaziun dal pajais causa l'economia che creschia mo plaun plaun. «Era politicamain vegn il pajais a stuair definir sia rolla causa che la China daventa adina pli ferma», di

Schmid. En connex cun ils debits menziuna Engler ils custs per la campagna electorala: «Sch'ins sa ch'igl èn vegnids investids 6 miliardas dollars en quella campagna vesan ins tge impurtanza che questa elecziun aveva en l'intern dal pajais.» Interessant fissi tenor el da savair tge che quels che hajan investì tant en la campagna electorala spetgian uss dal reelegì. I dettia en egl il grond foss tranter las duas alas, las partidas dals democrats e dals republicans, cuntinuescha'l, «i mancan las partidas tranteren, qua en ins mo l'in u l'auter ed ins nun è mo adversari, mabain schizunt inimi.» Era Schmid di ch'ìls Stadis Unids da l'America sajan in pajais dividi fitg ferm, tranter povers e ritgs, giuven e vegls, alvs e nairs. «Quest pajais resta dividi er ils proxims quatter onns», accentuescha'l, ins haja vis quai era durant il cumbat electoral: «Tuttas duas varts nun han spargnà cun atatgas savens detg persunalas, cun reproschas e da tutta sorts pretenziuns als commembers da l'auter bloc.»

«Cuntinuitad d'avantatg era per la Svizra»

Tge consequenzas ha la reelecziun d'Obama per la Svizra? «En quai che riguarda las tractativas en chausa bancas e cunvegna fiscala na vegni probablmain betg a sa midar bler», manegia Barbara Janom Steiner. Ins na dastgia betg far illusiuns, di Stefan Engler, «ils Americans cun lur gronds debits vegnan pli tgunsch a cuntinuar cun lur lingia dira en las tractativas per avair ulteriuras entradas finan-

zias.» Martin Schmid è da l'avis che d'evader quests problems cun la Svizra na saja betg emprima prioritad per ils Americans, «era, sche quai fiss impurtant per noss pajais.» Sche Romney fiss vegni elegi fissi dentant sco che la presidenta da la regenza accentuescha anc pli difficil: «L'avantatg è ch'ins po cuntinuar uss a tractar vinavant cun la medema glieud, sch'igl avess dà là in midament fissi anc pli difficil a chattar ina schliaziun safisfaccanta per tuttas duas varts.»

Per il Grischun mo paucas consequenzas

Per il Grischun na vegn la reelecziun da Barack Obama al timun dals Stadis Unids da l'America betg ad avair grondas consequenzas. «Nus Grischuns survegnin invista, contact cun Americans per il solit al FEM, cur che parlamentararis, senatur e schizunt presidents visitan l'occurrenza a Tavau», di Stefan Engler. «Be quest onn han las delegaziuns americanas sa laschadas stgisar, i hajan da sa concentrar sin il cumbat electoral, avevani ditg», cuntinua Barbara Janom Steiner. «Sunter che Bill Clinton è stà en sia funcziun sco president e suenter era sco anteriur president da l'America pliras giadas al FEM fiss quai segiramain puspè in grond eventiment per il Grischun, sch'era Obama vegniss durant ils proxims quatter onns ina giada a Tavau», manegia Martin Schmid, «ins na dastga però betg emblidar che quai signifitgass in augment considerabel da las mesiras da segirezza per al proteger ed era dals custs.»



La famiglia Obama sa legra da la reelecziun dal president da l'America. KEYSTONE